

LANGEL-KÖCHER, URSULA (52): *Funkemarieche*

Eimol Funkemarieche zo sin, dat wor minge Draum. Wie ich vier Johr ald wor, kräht ich e Funkemariechekostüm vun minger Kusun Doris. Ich wor stolz un hatt dä Draum, om Rosemondagszog met op enem große Pääd ze rigge.

Wie ich en der drette Klass en Gremberg en der Grundschull wor, kome ming Eldere vum Sprechdag un verzällte, dat uns Schull beschlosse hätt, em nächste Johr bei de Schull- un Veedelszög metzegonn. Wat wor ich fruh dat zo hüre. Ich soh mich ald widder als Marieche op em Pääd Kamelle un Strüüßcher schmieße. Vill Eldere ginge manche Ovend noh der Schull öm Kostüme zo bastele.

Un irgendwann kräht ich met, dat minge Draum geplatz wor. Mer sollte all als Waldschrat gonn met nem Hot om Kopp, an däm Tannezappe un Gröns gebunge wor, un met enem wasserfeste Ömhang, falls et rähne dät. Ich wor entsetz! Marieche un Waldschrat, jet Ungerschiedlicheres dat kunnt et doch gar nit gewe. Doch besser, wie gar nit op enem Fastelovendsömzog metzegonn, wor, als Waldschrat metzegonn. Su han ich dat einfach gemaht. Et hät ech Spass gemaht, och en dä Verkleidung.

Em kummende Johr si' mer als Schull noch ens metgegange, un zwar als Römer. Dat wor nit wasserfess, ävver urkölsch. Enzwesche ben ich Fastelovend ni' mih su off en Kölle, weil mer do, wo ich jetz wonne, nit frei han. Hee kenne vill Lück gar keine Fastelovend, bloß Fasching. Ävver dat es nit esu löstig wie Fastelovend en Kölle un et es och niemols am Rusemondag, sondern immer am Sonntag.

Jo, rigge han ich geliert, han off op nem Pääd gesesse, ävver niemols als Funkemarieche. Su es dat ene Draum geblewe, wat nit et Schläächste es. Der Minsch bruch jet för zo dräume.

Langel-Köcher, Ursula (52): *Funkemarieche*

ʔeɪmo:l fʊŋkəma'bi:ɦə tʃo zɪn dat vɔɐ̯ miŋə dʁo:m ʔals_ɪɦ fiɐ̯ jo: ʔalt vɔɐ̯ kʁe:d_ɪɦ ʔə fʊŋkəma'bi:ɦə kɔs.tʏm fʊn miŋə ku'zi:n do:ʁɪs ʔi:ɦ: vɔɐ̯ ʃtɔltʃ ʔʊn hatə dɛɐ̯ dʁo:m ʔom ʁo:zə'mo:ndaxstʃox met ʔob_ənəm jʁo:sə pɛ:t:sə ʁɪgə ʔals_ɪɦ ʔɪn də dʁɪtə klas ʔen 'jʁe:mbeʁɦ ʔen də 'jʁʊntʃʊl vɔɐ̯ ko:mə miŋ ʔeldəxə fʊm 'ʃpʁɛɦta:x ʔʊn fɛtʃɛltə dat ʔʊns ʃʊl bɛʃlɔsə hət ʔim nɛ:stə jo:ɐ̯ bɛɪ də ʃʊl_ʊn 'fɛ:dəlstʃɪɦ 'met:səjɔn vat vɔɐ̯ ʔɪɦ fʁu: dat:su hyɐ̯xə ʔʊn ʔɪɦ zo: miɦ ʔal vɪdɛ ʔals ma'bi:ɦə ʔop_əm pɛ:t ka'mɛlə ʔʊn ʃtʁy'sjə ʃmi:sə ʃɪl ʔeldəxə jɪŋə manɦə ʔo:vənt nɔ: də ʃʊl ʔom kɔs'ty:mə tʃo bastələ ʔʊn ʔɛ:ʝəntvan kʁe:t ʔɪɦ met dat miŋə dʁo:m jəblatʃ vɔɐ̯ mɛ zʊltɛ ʔal ʔals 'val:tʃʁa:t jɔn met nəm ho:t ʔom kɔp ʔan dɛm 'tanɛtʃapfə ʔʊn jʁø:ns jəbʊŋə vɔɐ̯ ʔʊn med_ənəm 'vasɛfɛstə 'ʔəmhan falts_ət ʁe:nə dɛ:t ʔɪɦ vɔɐ̯ ʔɛnt'sɛtʃ ma'bi:ɦə ʔʊn 'valtʃʁa:t jɛt ʔʊŋɛʃi:tlɪɦɛxəs dat kʊnd_ət dɔx ja: nit jɛvə dɔx bɛsɛ ʔals ja: nit ʔob_ənəm faste'lo:vənts_ʔʊmtʃox met:səjɔn vɔɐ̯ ʔals 'valtʃʁa:t met:səjɔn ʔʊn zʊ han_ɪɦ dat ʔaɪnfax jəma:t ʔət hət ʔɛʃ:pas jəma:t ʔox ʔen dɛ:ɐ̯ fɛklɔɪdʊŋ ʔɪm kʊməndə jo: zɪ_me ʔals ʃʊl nɔx_əns 'metjəjanə ʔʊn tʃva ʔals ʁø:mɛ dat vɔɐ̯ nit 'vasɛfɛs ʔɛvɛ 'ʔʊɐ̯kœl_ʃ ʔɛntsveʃə ben_ɪɦ faste'lo:vənt ni_mi zʊ ʔɔf ʔen kœlə vel mɛ dɔ: vo ʔɪɦ:ɛtʃ vʊnə nit fʁaɪ han he: kɛnə ʃɪl:yk ja: kɛnə faste'lo:vənt blo:s 'faʃɪŋ ʔɛvɛ dat ʔes nid_əzʊ lɔstɪɦ vi faste'lo:vənt ʔen kœlə ʔʊn_d_ɛs ʔox 'ni:ma:ls ʔam ʁu:zə'mo:nda:x zʊndən ʔɪmɛ ʔam 'zʊnda:x jo: ʁɪgə han_ɪɦ:əli:ɐ̯t han ʔɔf ʔop nəm pɛ:t jəzɛsə ʔɛvɛ 'ni:ma:ls ʔals 'fʊŋkəma,bi:ɦə zʊ ʔes dat ʔene dʁoʊm jəblevə vat nit:at ʃlɛ:ɦtɛstə ʔes də miŋʃ ʁɛʊx jɛt tʃom dʁøymə